



SUATEA



Reclamación Llingua Asturiana y Gallego-Asturiano n' Educación Infantil

Dafechu metíos los centros educativos en tiempu d'almisión d'alumnáu, de nueves matriculaciones y planificación del cursu que vien, ye la hora na que les madres y padres tienen d'escoyer voluntariamente que los sos fíos/es reciban enseñances d'asturianu o gallego-asturiano. Como yá sabréis polos distintos comunicaos y notes de prensa que lleva publicando SUATEA, la Consejería Educación, al traviés del Serviciu Inspección, lleva negando sistemáticamente a persones y centros que lo solicitaron, el que l'alumnáu d'**Educación Infantil** puea recibir clases de Llingua Asturiana o Gallego-Asturiano. D'esta manera, dellos centros que dende hai cuantayá les recibíen, estos dos caberos años, quedaron ensin elles. Nengún centru onde nunca s'impartió Llingua n'Educación Infantil y solicitó esti cursu ufiertales o ónde padres solicitaron que los sos fíos/es recibieren clases con estos conteníos, fue atendíu per parte de la Consejería Educación.

Estes actuaciones suponen la **vulneración** del artículo 10 de la Llei d'Usu (*"Nel exerciciu de les sos competencies, el Principáu d'Asturies va **garantizar la enseñanza del bable/asturiano en tolos niveles y graos**, respetando non obstante, la voluntariedá del so deprendizaxe..."*), per parte de los más altos cargos de l'Alministración educativa y amás con conocimientu de causa: n'entrevista que tuvimos cola Xefatura de Personal Docente y del Serviciu Inspección, asina-yos lo alvertimos.

Como reacción a esta actitú y actuaciones contraries a derechu, SUATEA, y delles madres y padres, vamos a presentar instancies dirixíes a la Consejería Educación denunciando esta situación, desixendo l'atención del alumnáu con estos conteníos y pidiendo esplicaciones de la desatención de los nuestros derechos, como **vía pa entamar la reclamación vía alministrativa qu'empatará na vía contenciosa** de nun ser atendíes les nuestros reclamaciones.

Col envís de potenciar esta campaña **podéis descargar les instancies de recalmación** na nuestra páxina web suatea@suatea.org. Hai dellos modelos según les circunstancies de la persona reclamante. Les persones, centros o asociaciones de padres y madres que les cubráis facémosles llegar firmaes al sindicatu personalmente o per corréu ordinariu pa presentales toes a la vez nel rexistru.

Uviéu 13 d'abril de 2012

SINDICATU UNITARIU Y AUTÓNOMU DE TRABAYADORES DE LA ENSEÑANZA D'ASTURIES

C/ Telesforo Cuevas 2, 1^ª A dcha. -33005 Uviéu. Tfno. 985 274 343. Fax. 985 236 464. E-mail: suatea@suatea.org Web: www.suatea.org